

Minister Ursell Arends riba ehecucion di maneho pa traspaso di permiso:

Crea oportunidad igual ta keda e prioridad

MINISTER di Transporte, Ursell Arends, a publica un decreto ministerial tocante ehecucion di su maneho pa cu traspaso di permiso riba [Publico.aw](#). Manera anuncia anteriormente, Minister Arends su maneho ta dirigi riba crea oportunidad igual pa ciudadanonan yega na remarke pa un permiso den transporte publico. Esaki ta un punto acorda den programa di gobernacion, y tambe den un mocion aproba pa Parlamento. Tempo y cifra lo demostra con e maneho nobo di Minister Arends lo realisa e meta aki.

Cada traspaso di un permiso den un famia, ta significa cu un ciudadano cu a haci un peticion pa yega na remarke pa un permiso, tin cu sigui warda mientras e famia di e vergunninghouder ta haya un permiso. E motibo ta cu permisonan den transporte publico ta limita na un cantidad maximo. Ora ta trata di permiso pa taxista, e maximo actual ta 465 y continuamente tur 465 ta otorga. Pues te ora un taxista stop di haci uzo di un permiso, Gobierno por otorga e permiso na un ciudadano wardando pa un permiso. Pero si sigui cu traspaso, e ciudadano lo tin cu sigui warda mientras permisonan ta keda circula den famianan.

Considerando e interes general di crea oportunidad igual, y tambe pa motibo di e 'fraudegevoeligheid' y 'integriteitsrisico's' di peticionnan pa traspaso, Minister Arends den tur transparencia a anuncia y publica e decreto ministerial di 31 di juli 2024 No. 2635/24. Awo Minister Arends ta anuncia por medio di decreto ministerial 2635/24-A con lo ehecuta e maneho. A tene varios dialogo cu representantenan di taxista pa tene cuenta cu puntonan di preocupacion legitimo.

Traspaso vs. oportunidad igual

Minister Arends lo ehecuta su maneho, pa en principio y den cuadro di e autoridad legal cu ley ta prescribi na e minister, no aproba peticionnan pa traspaso, tanten cu no ta irasonabel pa no aproba un traspaso. Asina Minister Arends ta ehecuta un maneho promoviendo oportunidad igual,

sin trata peticionarionan di traspaso na un manera irasonabel. Ta importante pa menciona cu tanten cu un permiso ta valido, un vergunninghouder por wordo asisti por medio di un hulpchauffeur den caso cu pa motibonan medico e chauffeur ta incapacita pa core su vehiculo.

Comision independiente

Un comision independiente lo conseha e Minister si pa un peticion individual y circunstancianan specifico lo ta irasonabel pa no aproba un peticion pa traspaso. E comision lo consisti di personanan selecta a base di profielschets, proponi pa e Minister (2 of 3) y proponi pa representantenan di vergunninghouders (1 of 2). Esaki ta un resultado di dialogo y sugerencia di representante di taxista. Tambe a fiha un toetsingskader mas estricto y transparente.

Otorgamento segun secuencia, cu atencion pa hulpchauffeurs

Di december 2023 pa februari 2024, personanan cu a haci peticion pa un permiso di taxi por a registra via website di BID ([bid.aw](#)) y inclui e fecha original di nan peticion. Cu e informacion aki, un lista a wordo compila di peticionnan cuminsando di e peticion mas bieu.

Pa empodera hulpchauffeurs, lo percura pa lo siguiente. Den practica, hulpchauffeurs a resulta di ta hopi dependiente di vergunninghouders pa por labora y den hopi caso bou di e impresion cu ta solamente via un traspaso nan por yega na un permiso. Pa empodera e posicion di hulpchauffeurs, esunnan interesa den un permiso lo wordo añadi den e lista a base di e fecha cu nan a cuminsa core como hulpchauffeur.

Aplicando e lista, permisonan lo wordo otorga cada biaha na esun mas halto den e secuencia (peticion mas bieu, esun wardando mas largo). Un proceso obhetivo sin patronahe politico, fixmento of fabornan politico. E proceso lo wordo haci transparente pa publico y Parlamento mas tanto posibel, teniendo cuenta cu privacidad di



peticionarionan.

Cumplimento cu debernan fiscal, registracion KvK y areglo financiero responsabel

Minister Arends lo sigui dialoga cu titularnan di permiso pa yega na areglonan responsabel di pensioen y seguro. Te unda cu por, Minister Arends lo facilita e areglonan aki. Lo evalua pa condiciona permisonan (nobo y ora di renoba) na cumplimiento cu debernan fiscal y registracion na Camara di Comercio.

Ehecucion responsabel

Minister Arends a scucha y dialoga. A tene cuenta cu preocupacionnan legitimo. Na final, Minister Arends ta para responsabel pa ehecucion di autoridadnan cu ley ta duna e Minister di Transporte. Cu e decisionnan tuma, un y tur por ta sigur cu Minister Arends lo sigui promove oportunidad igual pa cada ciudadano cu kier yega na remarke pa un permiso den transporte publico y lo sigui tuma decisionnan pa preveni posibel corrupcion. E tempo nos dilanti lo demostra e cambio den con un Minister di Transporte ta tuma decisionnan relaciona cu otorgamento di permiso di taxi. Un cambio di practicanan tradicional di decadanan.

Minister Arends ta spera cu politiconan cu pensamento diferente expresa esaki na un forma responsabel, sin uza taxistanan como pion pa sirbi interesnan politico y di partido.